

*Wit Gele Kruis hunto cu Arubaway Foundation a presenta*

# Proyecto pa concientisa riba problema di obesidad presenta na Minister Dr. Richard Visser

ORANJESTAD- E ultimo cifranan di aña 2007 ta indica cu tin un aumento di malesanan cronico, cual dia pa dia ta birando un situacion bastante serio den nos comunidad. Actualmente tin instancia y clubnan di servicio cu ta purba hasi lo maximo pa combati e problema di obesidad na Aruba. Wit Gele Kruis a uni forza cu Arubaway Foundation pa asina hunto patrosina un produccion di television pa concientisa comunidad henter riba e consecuencianan di obesidad. Kier logra pa separa di pasa e programa na television, pa pase tambe den oficinanan di dokter y oficinanan publico di gobierno.

Di acuerdo cu Sr. Gino Goeloe di Wit Gele Kruis, mester hasi algo conhuntamente, esta un plan strategico nacional pa asina nos por ataca e problemanan aki desde su rais, esta di scol basico te na nos grandinan. "Esey nos ta logre logicamente door di traha hunto cu otro", asina el a duna di conoce.

Di parti di Wit Gele Kruis nan ta haciendo nan maximo esfuerso dor di organisa charlanan y presentacionnan na diferente companianan manera hotelnan, departamentonan di gobierno y companianan priva. Aki ta haci chekeonan di sucu, colesterol, preshon, peso y tambe di trigliceride.

Loke a bin ripara ta cu por lo menos 50% di empleadonan na e companianan cu a bishita ta sufri di trigliceride haltu.

WGK ta purba di mostra e instancianan, mescos cu e personal cu nan tin cu come saludable. Nan ta keda haci e chekeonan pa asina alerta e personanan pa nan bira mas conciente di nan curpa. "Nos tin cu cuminsa respeta nos curpa pasobra si nos no ta respete, ta ken ta respete, ken ta cuide?"

Wit Gele Kruis kier ta e "role model" na Aruba. Den opinion di Gino Goeloe, si Aruba no pone enfasis riba e

parti di prevencion nos ta bai ripara cu cada bez nos lo tin di gasta mas den e parti curativo. A menciona cu casi 80% di e placa di AZV ta bai den e parti curativo y esey no por.

Mester hinca mas placa den e parti preventivo y di cuidu.

Datonan ta muestra cu p.e. na Hulanda, nan ta inverti 45,12 milliard Euro den salud pa anja, di cual 46.8% ta bai pa e parti curativo, mientras cu 37.6% den e parti di prevencion y cuidu.

Pa loke ta Aruba, AWG 340.538 miyon ta wordu inverti entotal den nos sistema di salud, ocupando un 78.6% e parti curativo, mientras cu solamente 8.2% ta bay den prevencion y cuidu.

Por ripara mesora cu Aruba, den comparacion cu Hulanda, ta gastando hopi placa den cura patientnan, siendo cu nos por enfoca mas na traha riba e parti di prevencion y cuidu pa asina evita yega asina leu di bay den e parti mas serio y complica, esta e parti curativo. Por ehempel si bo por preveni cu un persona ta bira un diabetico, di haña atakenan celebral y di curazon etc., asina nos no mester gasta tanto placa den e parti curativo.

Recientemente e dos organisacionnan a bishita Minister dr. Richard Visser pa dune mas informacion riba e produccion di television cu hunto nan a hinca den otro.

E programa aki ta pa concientisa nos comunidad di Aruba pa bira mas saludabel. E programa ta consisti di 13 serie. Wit Gele Kruis y Arubaway Foundation ta orguyoso di por aporta na bienestar general di nos comunidad.

Riba e potret por mira Minister dr. R. Visser, sra. C. Bryson Dietista, sr. Gino Goeloe director WGK, sra. M. Falconi-Rasmijn representante di Arubaway Foundation, sr. N. Thijsen director di Sky-Television.

